

Ich tanze

Sit Jesus i mim Läbe di erschti Giige spielt
Da hör ich nümm uf tanze, mal langsam und mal wild
Ich tanze, will mir Jesus all Grund zum Tanze git
Drum tanz ich, bis ich nüme chan – chumm und tanz doch mit

Ich tanze i de Stube, wo min Paps am Läse isch
Über d' Couch, um d'Palme und um de Stubetisch
Ich tanze, will mir Jesus...

Ich tanze i de Chuchi, wo's Mami choche tuet
Ich tanze um di volle Töpf, ja das chunnt sicher guet
Ich tanze, will mir Jesus...

Ich tanze i mim Zimmer, ich tanze uf mim Bett
Leider weiss ich ersch sit hüt, dass ich das nüme sett
Ich tanze, will mir Jesus...

Ich tanze uf em Schuelwäg und uf em Pauseplatz
Um de Golf vom Lehrer, um em Abwart sini Chatz
Ich tanze uf em Balkon bi Räge und bi Wind
D'Nachbere, sie langed sich jedes Mal an Grind

Ich tanze i de Duschi, ich tanze im Büro
Und für die, wo's wunder nimmt, ich tanze au im Klo
Ich tanze, will mir Jesus...

Ich tanze a de Decki, sobald ich weiss, wie's gaht
Wo's Platz hät zum Versoue, will nüt det umestaht
Ich tanze, will mir Jesus...

Plausch im Räge

Ich ha de Plausch im Räge, ha de Plausch im Schnee
de Plausch im Hagel sogar no meh
Ich ha de Plausch i de Sunne, ha de Plausch im Wind
Ich bin ja schliesslich Gottes Chind

Ich ha de Plausch im G'witter, ha de Plausch im Sturm
Ich stahn fescht grad wie-n-en Turm
Ich ha de Plausch i de Sunne, ha de Plausch im Wind
Ich bin ja schliesslich Gottes Chind

Ich ha de Plausch i de Biise, ha de Plausch im Föhn
Au wänn's sträzt, find ich's no schon
Ich ha de Plausch i de Sunne, ha de Plausch im Wind
Ich bin ja schliesslich Gottes Chind

Ich ha de Plausch im Näbel, wie du dich au treesch
Wänn'd chuum meh zäh Meter g'sehsch
Ich ha de Plausch i de Sunne, ha de Plausch im Wind
Ich bin ja schliesslich Gottes Chind

Herr, ich singe dir zu Ehre

Herr, ich singe dir zu Ehre, Herr, ich juble, was ich nu cha
Dänn du häsch esonen Huuffe für mich taa

Herr, ich singe dir zu Ehre, Herr, ich juble, was ich nu cha
Dänn du häsch esonen Huuffe für mich taa
Herr, ich singe dir zu Ehre, Herr, ich juble, was ich nu cha
Herr, nur dich eleige bät ich aa

Mit dir gahn ich dur Dick und Dünn, wo immer's duregaht
Mit dir gahn ich dur Wasser und dur Fүүr
Öb's ufe-n-oder abe gaht, ja, du weisch immer Rat
Mis Läbe isch mit dir eis Abentүүr

Du eleige

Wer isch damals scho det g'sy a mim erschte Tag
Wer hät g'hulfe bi mim erschte Schnuf?
Wer hät g'schänkt, dass ich wachse und mir nüt passiert?
Under wem sinre Hand wachs ich uf?

Du eleige häsch für mich dis ganzi Läbe aneg'leit
Uf mim ganze Läbeswäg häsch du mich sicher dure treit
Und du haltisch i dim Königriich en Platz für mich bereit
Du elei, Jesus, du elei

Wer begleitet mich sicher und mit fiiner Hand
Weiss de Wäg dur de Tag und dur d'Nacht
Wer teilt alles mit mir, glich öb Freud oder Leid
Und wer weiss g'nau, was Sorge mir macht?

Und wer git mir die Stärchi, dass ich chan be stah
Sogar gäg übermächtig Find
Wer leit mitte im Kampf mir e Siegeschrone aa
Und wer nännt mich uf ewig sis Chind?

Am Mäntig

Am Mäntig am Morge, da lütet min Wecker, es fangt e neui Wuche-n-a
Mit siebe Täg voll Abentüür, won ich all chuüm erwarte cha
Anderi mached en Lätsch und sind hässig, ich chan das würekli nöd verstah
Gott hät doch au de Mäntig g'macht und isch au am Mäntig da

Am Ziischtig juck ich zu de Fädere us und ich föhl mich scho wieder voll im Saft
Und während ich no singe, hämmer's wieder bis zum Mittag g'schafft
Hei, göhnd die Stunde verbii mit 'me Lied i mim Herz und 'me Tanze i de Bei
Jä, weisch, mit Gott föhl ich mich eifach überall dihei

Am Mittwuch, da hauemer b'sunders uf d'Pauke, das isch ganz en b'sunderige Tag
Am Namitsch hämmer frei, da göhmmer use, da git's gar kei Frag
Ich und min Fründ, ja mir spieled im Wald und bestuuned die Wunder rund um eus
I dere Wält, wo Gott hät g'macht, gsehsch immer wieder Neus

Du bisch siebe Täg, Herr, rund um d' Uhr bi mir
Drum bin ich so zwäg und drum so Fan vo dir

Am Dunnschtig, da hät's mi verwütscht und ich han grad e mittleri Megakrise g'ha
Zum Glück hät mir min Fründ do g'hulfe und mich nöd eleige lah
Niemer hät's immer nu guet, und so land halt au ich ab und zue mal uf em Buch
Doch Jesus g'seht's ja cho und er schickt Hälfer, wänn ich's bruch

Am Friitig, da bin ich scho wieder uf Toure, es gaht wieder gäge 's Wuchenänd
Obwohl ich nöd zu dene g'hör, won e Pause dringend nötig händ
D'Täg möged lang sy, de Himmel verhange, d' Matheprüefig no so schwer
Solang ich nöch bi Jesus bliibe, isch min Tank nie leer

Am Samschtig, da lauft immer mega de Huuffe – ich frög mich: Gopf, wie chan das sy
Warum gaht d'Zyt usg'rächnet dänn grad dopplet eso schnäll verby?
Völlig egal, öb'd dihei bisch, im Wald, i de Badi oder amne Fäscht
Urplötzlich isch es z'Abig spat und 's heisst: Du g'hörsch is Näscht

Du bisch siebe Täg, Herr, rund um d' Uhr bi mir
Drum bin ich so zwäg, Herr, drum so Fan vo dir

Am Sunntig, da gaht's ehnder ruhig zue und her, es isch wiit und breit kä Schuel in Sicht
Ich g'nüsse scho de Morge und zum Z'mittag git's mis Lieblingsg'richt
Spöter tänk ich no chli z'rugg a die Wuche und bin no echli für mich elei
Ich merk, was ich alls han, und danke Gott für mis Dihei.

Es stürmt

Es stürmt und es schiffet und es windet und es tuet, doch mis Huus blibt stah
Ich boue ebe uf de starchi Felse, so dass mir nüt schade cha

Mim Nachbar sis Hus, das staht ufem Sand, aber ich bin froh
Dass mis uf em Felse staht, und 's ich cho, wie's hät müesse cho

Mim Nachbar sis Hus, das isch jetz wäg, aber ich bin froh
Egal wie fescht dass es stürmt: Mis Huus staht immer no

Wär nöd will tue, was Jesus seit, ja dä bout uf Sand
Aber dä, wo macht, was er seit, isch sicher i sinre Hand

Das isch min Gott

Ich han en Gott, wo immer da isch, grad wänn ich ihn nötig ha
Ich ha kei Angscht i Sturm und Fүү, wänn ich sini Hand a minre g'spür

Ich gahn dur d'Wält mit Ruggewind, er nännt mich voller Stolz sis Chind
Drum will ich, dass es jede weiss: Min Gott und ich, mir zwei sind eis

Das isch min Gott, min Gott elei, bi ihm, da isch mis Herz dehei
Das isch min Gott, und g'nau de Glich, won er für mich isch, chan er au sy für dich.

Wer schimpft nöd grad wäg jedem Seich, und wer macht herti Herze weich?
Wer schänkt eus d'Liebi zunenand, und wer drängt nie öpper an Rand?

Wer hilft, wänn'd uf de Nase landisch, und wer verbindet, was obenand isch?
Wer richtet uf und macht nie schlapp, und wer wüsch jedi Träne ab?

Jesus isch a dinere Siite

Häsch en riese Striit erläbt; du weisch fasch nüm, wo Friede finde
Und wer hilft dir all das überwinde?

Sehnsch di nach Geborgeheit, und g'suecht häsch überall vergäbe
Lueg doch, dä, wo git, staht grad denäbe

Jesus isch a dinere Siite, g'sehsch en nöd, und doch isch er da
Dur liechti und dur schwierig Ziite. En bessere Fründ wirsch du nie ha

Bisch grad ziemli bös umg'heit, und d'Schmerze sind etz grad am gröschte
Nöd verzwiifle: Eine cha di tröschte

Häsch grad hüt e Prüefig g'ha; sie isch der nöd grad super g'lunge
Doch scho churz denaa häsch wieder g'sunge

's nöchschte Mal, wänn'd truurig bisch, mit üssre oder innre Schmerze
Dänn sing doch, öb luut oder still im Herze. Dänn chasch singe

Vill händ nie vo Jesus g'hört, sogar wänns no so hetted welle
Chumm, mir göhnd ne's allne go verzelle

Vo vorne

Vo vorne und vo hinde und vo links und rächts
Und vo obe und vo une hebet mich min Gott
Ja, er isch immer bi mer und er hilft mer
Und es cha mir niemer schade, wo mir schade wott

Vo vorne chömed mängisch Finde
Ja mängisch fasch no meh vo hinde
Doch sölled's nume cho
Und ich säg dir wieso

Uf's Mal, da chan öppis Schlächts
Vo links cho oder rächts
Und trotzdem bliib ich froh
Und ich säg dir wieso

Vo obe chübled's scho am Morge
Vo une chömed Angscht und Sorge
Doch hät's mer d' Freud nöd g'noh
Und ich säg dir wieso

So luut rüef ich

So luut rüef ich, wänn's heisst: Wer wett es Glacé? IIIICH !
Und so luut für mis Lieblings-Fuessballteam: GOOOOL !
Und so luut, wänn ich Gott so richtig lobe: YEEEEAH !
Mis Herz gumpt immer, wänn ich dank an ihn

Ich lobe J: J wie juhui
Ich lobe E: Eifach genial
Ich lobe S: Sensationell
Ich lobe U: Unheimlich cool
Ich lobe S: S wie supermegaoberhünestarch
Lob dich, Jesus, du bisch würkli wunderbar !

So luut rüef ich, wänn's heisst: Wer wett es Glacé? So lut rüef ich, so lut rüef ich
So luut rüef ich, wänn's heisst: Wer wett nöd ufrume? So lut rüef ich, so lut rüef ich
So luut rüef ich, wänn's heisst: Wer will go snöbe? So lut rüef ich, ich, ich
So luut rüef ich, wänn's heisst: Wer will Gott lobe?